

Meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumillu perorsarsimassusaannut iluaqutaasussamik nunnatsinni meeqqanut suli atualinngitsunut perorsaanikkut inerikkiartuutaasumik ilaqtariit meerartallit nuna tamakkerlugu atuinissamut piarerfissaqalernissaat qanoq qulakkeerneqarsinnaanersoq pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Hans Enoksen, Partii Naleraq)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Ilaqtariinnut meerartalinnut annikitsunik inoqtigiittut isertitaqartartunut annertunerusumik atualinnginnermi perorsarsimassusaannut iluaqutaasussamik pissarsinissamut peqataanissamullu piviusumik periarfissaqalernissaasa qulakkeerneqarnissaannut apeqquteqaat aallaavigalugu oqallinnissamik siunnersuummut Naalakkersuisut qujapput.

Inussiarnersumik Naalakkersuisunit siunnersuuteqartumut erseqqissaatigineqassaaq, atualinnginnermi suliniutinik pilersitsineq ingerlatsinerlu kommuninit susassaqarfineqarmata. Ulluunerani paaqqinnittarfiit, ulluunerani paaqqinniffinnik aaqqissuussinerit aamma suliniutit allat kommuninit ingerlanneqartarput. Taamaasilluni Namminersorlutik Oqartussaanningsunit suliniutit tamakku ingerlanneqassapput.

Innuttaasut isumaqarunik, kommuninit suliassat naammaginartumik naammassineqartanngitsut, innuttaasut ataasiakkaat periarfissaqarput atualinnginnermi inuinnartut suliniutinik aallartitsinissamut. Nalunaarutigineqarsinnaavoq, Nuummi ulluunerani paaqqinnittarfiit inuinnarnik pilersinneqarsimasut marluummata. Nalunaarutigineqarsinnaavoq, ulluunerani paaqqinnittarfinnut inuinnarnik ingerlanneqanngitsunut, ulluunerani paaqqinniffinnut aamma neqeroorutitut allanut aningaasartuutit kommuninit atuisunillu ataatsimoortumik akilerneqartarmata. Taamaasilluni kommuninit aalajangerneqartarpoq, atualinnginnerup tungaani kommunit tapiissutaat qanoq annertugissanersut. Kommunit aamma namminneerlutik aalajanger sartarpaat, ulluunerani neqeroorutit qanoq ittut neqeroorutigineqassanersut. Taamaasilluni kommunit kiffartuussineritut killiffii aamma ilinniarsimasunik sulisut qassiunissaanni assigiinngissuseqartartut Naalakkersuisunit ilisimaneqarput. Naalakkersuisunit nalunaarutigineqarsinnaavoq, ulluunerani paaqqinnittarfinnut aamma ulluunerani paaqqinniffinnut akigititat 2008-miilli allangortinneqarnikuunngimmata. Taamaasilluni pisariaqarpoq nalilissallugit ulluunerani neqeroorutini akigititat ullutsinnut naapertuuttuunersut.

Siunnersuuteqartoq Naalakkersuisunit qutsavigineqarpoq, Inatsisartullu pitsaasumik oqallilluarnissannik kissaallugit.